

Svilanović: Milion radnih mjesta do 2020. godine nije nemoguć cilj

Vijeće za regionalnu saradnju (RCC) u proteklih godinu i po dana je od uopštenog razgovora o miru, stabilnosti i povjerenju, svoje aktivnosti u potpunosti usmjerilo prema ekonomiji, kazao je u intervjuu za Anadolu Agency (AA) generalni sekretar Vijeća za regionalnu saradnju (RCC) Goran Svilanović.

Svilanović smatra kako je najveći problem stanovnika kako BiH, tako i Srbije i drugih zemalja okruženja nezaposlenost. On vjeruje da su protesti u Sarajevu bili protesti nezadovoljnih ljudi, koji će se sigurno ponoviti u regionu, a dešavali su se već, čak i u zemljama koje su dio Evropske unije.

Protesti nezadovoljnih ljudi

"Osnovnu temu sada smo mi uzeli za svoje angažovanje, da probamo okupiti zemlje oko ekonomije. Rezultat toga je strategija Jugoistočne Evrope do 2020. godine, SEE 2020, a koju sam imao priliku predstaviti i na Sarajevo Business Forumu. Posao je prva riječ u toj strategiji, a zatim prosperitet u evropskoj perspektivi na putu pridruživanja", istakao je Svilanović.

Više od 14 milijardi eura vrijednost je međusobne trgovine u regionu 2012. godine, otkrio je Svilanović, što je 16 posto ukupne trgovine zemalja regiona sa drugim zemljama svijeta. Kada je riječ o investicijama iz jedne zemlje regiona u drugu, riječ je o iznosu od preko dvije i po milijarde eura. Nedavna posjeta premijera Republike Srbije Aleksandra Vučića Sarajevu govori o važnosti dobrosusjedskih odnosa, istakao je Svilanović, ona je ozbiljno ohrabrenje i pružena ruka prijateljstva koja je dobro primljena.

Svilanović je podcrtao važnost povezivanja ekonomija iz regiona u nastupanju na trećim tržištima. Strategija SEE 2020 je fokusirana na ekonomske i socijalne teme i zapošljavanje kao najveći problem.

"Ukoliko razgovarate sa predsjednikom vlade i ministrima bilo koje od zemalja u regionu, verujem da će i oni to istaći kao prvi problem i najveći izazov pred kojim se nalaze", istakao je Svilanović.

Svilanović se osvrnuo na proces usvajanja strategije, istakavši kako su očekivanja od BiH u Briselu bila veoma mala. On je istakao kako je usvajanjem strategije od Vijeća ministara, BiH pokazala da političari mogu da se dogovore kada su posrijedi teške socijalne i ekonomske teme.

"To je bila jednoglasna odluka Vijeća ministara. Bili su veoma jedinstveni i bio sam im veoma zahvalan kada su rekli da se oko toga svi slažu, bez obzira kojem narodu pripadaju", rekao je Svilanović.

Milion radnih mjesta

Strategija SEE 2020 govori o milion radnih mjesta, koji će biti otvoreni do 2020. godine u regionu. Ali, dodaje Svilanović, u regionu je od 2008. godine od kada je krenula kriza, bez posla ostalo 800.000 ljudi.

"Kada govorim o milion radnih mjesta do 2020. godine, ja govorim o tome da se ti ljudi vrte na posao i da se možda još poneko zaposli. Nije to previše optimistično. Vrlo sam zahvalan predsjedavajućem Predsjedništva BiH Bakiru Izetbegoviću, koji je prilikom otvaranja SBF 2014 javno izrekao podršku strategiji, istakavši kako je to ono što se želi postići", naglasio je Svilanović.

Nemoguće je biti na vlasti u BiH, ali i Srbiji, Hrvatskoj i drugim zemljama regiona, tvrdi Svilanović, ako ljudi ne vide da se stvari pomjeraju naprijed u ekonomskim i socijalnim pitanjima.

"Vjerujem da će strategija biti primijenjena i da će svi uraditi sve što mogu. Ono što mene brine nije da li će ljudi koji vode ovu zemlju i druge oko nje imati hrabrosti da se tim temama bave, već da li će ih na jednako odlučan način naredne godine pratiti Brisel i zemalje članice EU", istakao je Svilanović dodavši kako će naredni korak u procesu pridruživanja zemalja regiona u velikoj mjeri zavisi od ekonomije.

"Uvijek će politički razlozi biti oko nas i uvijek će biti tema koje će trebati rešiti. Ali, ministar zemlje članice EU, da bi se obratio svojim građanima da kaže kako potpisuje pridruživanje BiH, mora prethodno da uvjeri svoje građane koji su njega birali, tu negdje. Nećemo mi preko noći biti tu, ekonomski i socijalno. Strategija SEE 2020 će biti mehanizam ozbiljnog unapređenja ekonomskog upravljanja u regionu. Iako to nije jedina tema u regionu, jeste sigurno najveća", zaključio je Svilanović.